

# 'Tak bertindih subjek falsafah, sivik'

Kandungan berbeza, tumpu aspek kerja kuat serta elak rasuah

Oleh Ahmad Suhael Adnan  
ahmad.suhael@bh.com.my

**Kuala Lumpur:** Dua kursus wajib baharu yang akan diperkenalkan di universiti awam (UA) bermula sesi pengambilan 2019/2020, tidak bertindih dengan mana-mana subjek falsafah atau sivik sedia ada.

Naib Canselor Universiti Utara Malaysia (UUM), Prof Dr Ahmad Bashawir Abdul Ghani, berkata kandungan dua kursus dikenali sebagai Falsafah dan Isu Semasa serta Penghayatan Etika dan Peradaban itu, tidak sama dengan subjek Ijazah Sarjana Muda Falsafah, Undang-undang dan Perniagaan dengan Kepujian (BPLB) yang ditawarkan di universiti itu.

Katanya, kedua-duanya juga akan menggantikan kursus Hubungan Etnik serta Tamadun Islam dan Tamadun Asia (TITAS),

yang akan ditukar status kepada subjek elektif berbanding wajib ketika ini.

"Kandungannya berbeza dengan subjek falsafah BPLB. Ia lebih menekankan pada aspek kerja kuat, disiplin, mengelakkan diri daripada rasuah dan sebagainya.

"UUM sedia melaksanakan kedua-dua kursus itu pada sesi pengajian semester 2019/2020 dan ia akan diajar di semester pertama. Silibusnya juga sudah diserahkan kepada pusat pengajian," katanya kepada BH, semalam.

Beliau mengulas pengumuman Menteri Pendidikan, Dr Maszlee Malik semalam, bahawa dua kursus wajib baharu itu akan diperkenalkan di UA selaras hala tuju pendidikan berteraskan nilai.

Sementara itu, Naib Canselor Universiti Putra Malaysia (UPM), Prof Datuk Dr Aini Ideris, berkata pertindihan yang ada dalam kandungan kedua-dua kursus dengan subjek sedia ada sangat minimum dalam topik yang kecil dan boleh ditambah baik.

Katanya, tenaga pengajar juga diberi masa untuk mengikuti latihan daripada Kementerian Pendidikan supaya bersedia mengajar kursus berkenaan yang akan



**UUM sedia melaksanakan kedua-dua kursus itu pada sesi pengajian semester 2019/2020 dan ia akan diajar di semester pertama.**

**Dr Ahmad Bashawir Abdul Ghani,  
Naib Canselor UUM**

diperkenalkan secara berperingkat, seperti diputuskan senat UPM.

"Kursus ini banyak kebaikannya, seperti menjadikan graduan



**Pertindihan yang ada dalam kandungan kedua-dua kursus dengan subjek sedia ada sangat minimum dalam topik yang kecil dan boleh ditambah baik.**

**Dr Aini Ideris,  
Naib Canselor UPM**

berfikir berlandaskan pengertian sebenar sesuatu isu berbanding hanya atas logik semata-mata, selain menerapkan nilai dan akhlak terpuji.

"Mereka juga boleh meneliti dan memahami isu semasa dan kaitannya dengan falsafah yang terbina dalam negara, manakala mempelajari adab membimbing pelajar berkelakuan secara halus, berseni, berhikmah dengan sistem nilai dipegang masyarakat.

"Contohnya, isu jerebu adalah manifestasi pemikiran dan etika individu atau kumpulan yang meletakkan matlamat sendiri sebagai keutamaan tanpa memikirkan kesan pada masyarakat," katanya.

Yang Dipertua Majlis Perwakilan Pelajar (MPP) Universiti Pendidikan Sultan Idris (UPSI), Muhammad Amirul Mukmin Roslan, menyifatkannya sebagai langkah baik untuk memastikan mahasiswa cakna dengan isu semasa.

"Kedua-dua kursus ini sangat relevan dan tidak membebankan pelajar, apatah lagi kepada kami pelajar UPSI yang bakal menjadi pendidik dan perlu memiliki nilai yang baik dan berpengetahuan.

"Namun, saya harap pelaksanaan dua kursus ini tidak terus menggantikan kursus TITAS yang perlu dikekalkan kerana ia menekankan aspek kepelbagaiannya di Malaysia," katanya.